

四庫全書

子部

欽定四庫全書

冊府元龜卷一百十七

宋 王欽若等 撰

帝王部

親征第二

後周武帝建德四年七月丙子召大將軍以上於大德殿帝曰太祖神武膺運創造王基兵威所臨有征無戰唯彼偽齊猶懷跋扈雖復戎車屢駕而大勲未集朕以寡昧纂承鴻緒往以政出權宰無所措懷自親覽萬機

便圖東討惡衣非食繕甲治兵數年以來戰備稍足而
偽主昏虐恣行無道伐暴除亂斯實其時今欲數道出
兵水陸兼進北拒太行之路東扼黎陽之險若攻拔河
陰充豫則馳檄可定然後養銳亭士以待其至但得一
戰則破之必矣王公以為何如羣臣咸稱善丁丑詔曰
高氏因時放命據有汾漳擅假名器歷年永久朕以亭
毒為心遵養時晦遂敦聘好務息黎元而彼懷惡不悛
尋事侵軼背言負信竊邑藏姦往者軍下宜陽繫繇彼

始兵興汾曲事非我先此獲俘囚禮送相繼彼所拘執
曾無一反而加以淫刑妄逞毒賦繁興齊魯軫殄瘁之
哀幽并啟來蘇之望既禍盈惡稔衆叛親離不有一戎
何以大定今白藏在辰涼風戒節勵兵詰暴時事惟宜
朕當親御六師龔行天罰庶憑祖宗之靈資將士之力
風馳九有電掃八紘可分命衆軍指期進發以柱國陳
王純為前一軍總管滎陽公司馬消難為前二軍總管
鄭國公達奚震為前三軍總管越王盛為後一軍總管

周昌公侯莫陳瓊為後二軍摠管趙王招為後三軍摠
管齊王憲率衆二萬趣黎陽隋國公楊堅廣寧軍侯薛
迴舟師三萬自渭入河柱國梁國公侯莫陳芮率衆一
萬守太行道申國公李穆帥衆三萬守河陽道恒山公子
翼帥衆二萬出陳汝壬午帝親率六軍衆六萬直指河陰
八月癸卯入於齊境禁伐樹踐苗稼犯者以軍法從事
丁未帝親率諸軍攻河陰大城拔之進攻子城未克帝
有疾九月辛丑夜班師水軍焚舟而退齊王憲及于翼

李穡等所在克捷降拔三十餘城皆棄而不守唯以王
藥城要害令儀同三司韓正守之正尋以城降齊戊寅
至自東伐

五年十月帝謂羣臣曰朕去歲屬有疾疹遂不得克平
逋寇前入賊境備見敵情觀彼行師殆同兒戲又聞朝
政昏亂政繇羣小百姓嗷然朝不謀夕天與不取恐貽
後悔若復同往年出軍河外直為撫背未扼其喉然晉
州本高歡所起之地鎮攝要重今往攻之彼必來援吾

嚴軍以待擊之必克然後乘破竹之勢鼓行而東足以窮其窟穴混同文軌諸將多不願行帝曰幾者事之微不可失矣若有沮吾軍者朕當以軍法裁之己酉帝總戎東伐以越王盛為右一軍總管杞國公亮為右二軍總管隋國公楊堅為右三軍總管譙王儉為左一軍總管大將軍竇恭為左二軍總管廣化公丘崇為左三軍總管齊王憲陳王純為前軍癸亥帝至晉州遣齊王憲率精騎二萬守雀鼠谷陳王純步騎二萬守千里徑鄭

國公達奚震步騎一萬守統軍川大將軍韓明步騎五
千守齊子嶺烏氏公尹昇步騎五千守鼓鍾鎮涼城公辛
韶步騎五千守蒲津關柱國趙王招步騎一萬自華谷
攻齊汾州諸城柱國宇文盛步騎一萬守汾水關遣內
史王誼監六軍攻晉州城帝屯于汾曲齊王憲攻洪洞
永安二城並拔之是夜虹見於晉州城上首向南尾入紫微
宮長十餘丈帝每日自汾曲赴城下親督戰城中惶窘
庚午齊行臺左丞侯子欽出降壬申齊晉州刺史崔景

嵩守城北面夜密遣使送款上開府王軌率眾應之未明登城鼓噪齊眾潰遂克晉州擒其城主特進開府海昌王尉相貴俘甲士八千人送關中甲戌以上開府梁士彥為晉州刺史加授大將軍留精兵一萬以鎮之又遣諸軍徇齊諸城鎮竝相次降款

十一月己卯齊主自并州率眾來援帝以其兵新集且避之乃詔諸軍班師遣齊王憲為後拒是日齊主至晉州憲不與戰引軍度汾齊主遂圍晉州晝夜攻之齊王

憲屯諸軍於涑水為晉州聲援癸巳帝自東伐獻俘于
太廟甲午詔曰偽齊違信背約惡稔禍盈是以親總六
師問罪汾晉兵威所及莫不摧殄賊衆危惶鳥棲自固
暨元戎反旆方來聚結游蒐境首尚敢趨趨朕今更率
諸軍應機除翦丙申放齊諸城鎮降人還丁酉帝發京
師壬寅度河與諸軍合

十二月戊申次于晉州齊人於城南穿塹自喬山屬于
汾水帝帥軍八萬置陳東西二十餘里齊主亦於塹北

列陣帝欲薄之以碍塹遂止自旦至申相持不決申後齊人填塹南引帝大喜勒諸軍擊之兵纔合齊人便退帝逐北斬首萬有餘級齊主與其麾下數十騎走還并州於是齊衆大潰軍資甲仗數百里間委棄山積辛亥帝幸晉州仍率諸軍追齊主諸將固請還師帝曰敵不可縱縱敵患生卿等若疑朕將獨往諸將不敢言癸丑軍次汾水關甲寅齊主遣其丞相高阿那肱率兵一萬守高壁帝麾軍直進那肱望風退散丙辰師次介休齊

將開府韓建業舉城降以為上柱國丁巳大軍次并州
齊主留其從兄安德王延宗等守并州自將輕騎走鄴
戊午高延宗僭即偽位己未軍次并州庚申延宗擁兵
四萬出城抗拒帝率諸軍合戰齊人退帝乘勢逐北率
千餘騎入東門詔諸軍繞城置陣至夜延宗率其衆排
陣而前城中軍却人相蹂踐大為延宗所敗死傷略盡
齊人欲閉門以門下積尸扉不得闔帝從數騎崎嶇危
險僅得出門至明率諸軍更戰大破之擒延宗并州平癸

西帝率六軍趨鄴以上柱國陳王純為并州總管

六年正月壬辰至鄴齊主先於城外掘塹豎柵癸巳帝率諸軍圍之齊人拒守諸軍奮擊大破之遂平鄴齊主先送其母及妻子於青州及城陷乃率數十騎走青州遣大將軍尉遲勤率二千騎追之甲午帝入鄴巳亥尉遲勤擒齊主及其太子恒於青州二月丁未齊主至帝降自阼階以賓主之禮相見高潛在冀州擁兵未下遣上柱國齊王憲與柱國隋公楊堅率軍討平之齊定州

刺史范陽王高紹義走入突厥齊諸行臺州鎮悉降關
東平

宣政元年四月突厥入寇幽州殺略吏民議將討之五
月己丑帝總戎北伐遣柱國原公姬願東平公宇文神
舉等率軍五道俱入發關中公私驢馬悉從軍癸巳帝
不豫止於雲陽宮丙申詔停諸軍事六月丁酉帝疾甚
還京

隋煬帝大業七年二月帝自江都御龍舟入通濟渠遂

幸涿郡壬午詔曰武有七德先之以安民攻有六本興之以教義高麗王高元虧失藩禮將欲問罪遼左恢宣勝畧雖懷伐國仍事省方今往涿郡巡撫民俗四月庚午至涿郡之臨朔宮于時遼東戰士及餽運者填咽於道晝夜不絕苦役者多為羣盜甲子勅都尉鷹揚與郡縣相知追捕隨獲斬決

八年春正月辛巳大軍集於涿郡以兵部尚書段文振為左候衛大將軍壬午詔曰天地大德降繁霜於秋令

聖哲至仁著甲兵於刑典故知造化之有肅殺義在無
私帝王之用干戈蓋非獲已坂泉丹浦莫匪龔行取亂
覆昏咸繇順動况乎甘野誓師夏啓承大禹之業商郊
問罪周發成文王之志永監前載屬當朕躬粵我有隋
誕膺靈命兼三才而建極一六合而為家提封所漸細
柳蟠桃之外聲教爰暨紫舌黃枝之域遠至邇安罔不
和會功成治定於是乎在而高麗小醜迷昏不恭崇聚
勃碣之間荐食遼瀛之境雖復漢魏誅戮巢窟暫傾亂

離多阻種落還集成川藪於累代播寔繁以迄今睠彼
華壤翦為夷類歷年永久惡稔既盈天道禍淫亡徵已
兆亂常敗德非可勝圖掩慝懷姦唯日不足移告之嚴
未嘗面受朝覲之禮莫肯躬親誘納亡叛不知紀極充
斥邊陲亟勞烽候闕柝以之不靜生人為之廢業在昔
薄伐已漏天網既緩前禽之戮未即後服之誅曾不懷
恩翻為長惡乃兼契丹之黨虔劉海戍習鞞鞞之服侵
軼遼西又青丘之表咸修職貢碧海之濱同稟正朔遂

復敝攘琛賫過絕往來虐及弗辜誠而遇櫛輶軒奉使
爰及海東旌節所次途經藩境而壅塞道路距絕王人
無事君之心豈為臣之禮此而可忍孰不可容且法令
苛酷賦斂煩重強臣豪族咸執國鈞朋黨比周以之成
俗賄貨如市冤枉莫申重以仍歲災凶比屋饑饉兵戈
不息徭役無期力竭轉輸身填溝壑百姓愁苦爰誰適
從境內哀惶不勝其弊迴首面內各懷性命之圖黃髮
稚齒咸興酷毒之嘆省俗觀風爰屆幽朔弔人問罪無

俟再駕予親總六師用申九伐拯厥阨危協從天意殄
茲逋穢克嗣先謨今宜援律啓行分旄屆路掩渤海而
雷震歷扶餘以電掃比戈按甲誓旅而後行三令五申
必勝而後戰左第一軍可鏤方道第二軍可長岑道第
三軍可海冥道第四軍可蓋馬道第五軍可建安道第
六軍可南蘇道第七軍可遼東道第八軍可玄菟道第
九軍可扶餘道第十軍可朝鮮道第十一軍可沃沮道
第十二軍可樂浪道右第一軍可黏蟬道第二軍可捨

資道第三軍可渾彌道第四軍可臨屯道第五軍可候
城道第六軍可提奚道第七軍可達頓道第八軍可肅
慎道第九軍可碣石道第十軍可東肫道第十一軍可
帶方道第十二軍可襄平道凡此衆軍先奉廟略絡繹
引途摠集平壤莫匪如狼如貔之勇百戰百勝之雄顧
盼則山嶽傾頽叱咤則風雲騰鬱心德攸同爪牙斯在
朕御元戎為其節度涉遼而東循海之右解倒懸於遐
裔問疾苦於遺黎其外輕齋遊闕隨機赴響卷甲銜枚

出其不意又滄海道水軍舟艦十里高颿電逝巨艦雲飛
橫斷沮江逕造平壤島嶼之望斯絕坎井之路已窮其
餘被髮左衽之人控弦待發微盧彭濮之衆不謀同辭
伏順臨逆人百其勇以此衆戰勢等摧枯然則王者之
師義存止殺聖人之教必也勝殘天罰有罪本在元惡
人之多僻脅從罔治若高元泥首轅門自歸司寇即宜
解縛焚櫬弘之以恩其餘臣人歸朝奉順咸加慰撫各
安其業隨才任用無隔夷夏營壘所次務在整肅芻蕘

有禁秋毫勿犯布以恩宥喻以禍福若其同惡相濟抗
拒官軍國有常刑俾無遺類明加曉諭稱朕意焉摠一
百一十三萬三千八百號二百萬其餽運者倍之癸未
第一軍發終四十日引師乃盡旌旗亘千里近古出師
之盛未之有也三月癸巳帝御師戊子臨戎于遼水橋
戊戌大軍為賊所拒不果濟右屯衛大將軍左光祿大
夫麥鐵杖武賁郎將錢士雄孟金义等皆死之甲午車
駕渡遼戰于東岸擊賊破之進圍遼東于時諸將為奉

旨不敢赴機而高麗城守攻之不下六月己未幸遼東
責怒諸將止城西數里御六合城七月壬寅宇文述等
敗績於薩水右屯衛將軍辛世雄死之九軍竝陷將帥
奔還亡者二千餘騎癸卯班師

十年二月辛未詔百僚議伐高麗數日無敢言者辛卯
詔曰黃帝五十二戰成湯一十七征方乃德施諸侯令
行天下盧芳小盜漢祖尚且親戎隗囂餘燼光武猶自
登隴豈不欲除暴止戈勞而後逸者哉朕纂承寶業君

臨天下日月所炤風雨所沾孰非我臣獨隔聲教蕞爾
高麗僻居荒表鷓鴣張狼噬侮慢不恭抄竊我邊陲侵軼
我城鎮是以去歲出車問罪遼羯殪長蛇于玄菟戮封
豕於襄平扶餘衆軍風馳電逝追奔逐北徑踰沮水滄
海舟楫衝賊腹心焚其城郭汚其宮室高元伏鑽泥首
送款軍門尋請入朝歸罪司寇朕已許其改過乃詔班
師而長惡靡悛宴安鴆毒此而可忍孰不可容便可分
命六師百道俱進朕當親執武節臨御諸軍按馬九都

觀兵遼水順天誅於海外救窮民於倒懸征伐以正之
明德以誅之止除元惡餘無所問若有識存亡之分悟
安危之機翻然北首聿求多福必其同惡相濟抗拒王
師若火燎原刑茲無赦有司便宜宣布咸使知聞三月
壬子行幸涿郡癸亥次臨渝宮親御戎服禡祭黃帝斬
叛軍者以釁鼓四月甲午車駕次北平七月癸丑次懷
遠鎮甲子高麗遣使降因送斛斯政帝大悅八月己巳

班師

唐太宗貞觀十八年十月帝欲親搃六軍以度遼海進封事者皆勸遣將不宜親行帝謂侍臣曰夫去本而就末舍高而取下失近而之遠此三者謂之不祥今國家經略高麗亦猶是矣然則察諸天時而觀乎人事夫嚴冬之月欲務稼穡使八堯運耜九舜布種則不能使之生青陽之月土膏脉起庸夫童子堪成良稼所謂天有其時而人有其功也高麗逆弑其主誅戮大臣而虐用其人下無措手而一方之人延頸思救弔人伐罪今也

其時議者云云但不知耳甲寅車駕幸雒陽宮十一月
壬申至雒陽甲午以光祿大夫刑部尚書鄖國公張亮
為使持節平壤道行軍大總管以左領軍將軍武水縣
伯常何瀘州都督戴國公左難當為副總管汾州刺史
黃國公舟仁德眉州刺史下傳縣男劉英銀青光祿大
夫行撫州刺史張文翰雲麾將軍行中郎將龐孝恭右
驍衛將軍東平郡公程名振並為行軍總管以隸之率
江淮嶺碇勁卒四萬長安雒陽召募三千戰艦五百艘

自萊州泛海趣平壤又以特進太子詹事左衛率英國
公李勣為使持節遼東道行軍大總管以禮部尚書江
夏郡王道宗為總管又以前幽州都督虢國公張士貴
右領軍大將軍安國公執失思力右驍衛大將軍張掖
郡國公契苾何力右監門大將軍阿史冊彌射右屯衛
將軍金城縣公姜德本左武衛將軍金城郡公麴智盛
雲麾將軍新鄉縣公吳黑闥營州都督博臨縣男張儉
左驍衛中郎將安縣和竝為行軍總管以隸之步騎六

萬并蘭河二州降胡趣遼東兩軍合勢庚子遣行軍總
管姜行本少府少監丘行淹先督工匠造梯衝於安羅
山百姓見往歲擊突厥吐谷渾高昌竝指期摧殄無不
勇於赴敵爭從召募矜其膂力者不可勝數或引佩刀
刺股以示勇決進攻城器械者相次于朝堂太宗皆親
加損益窮其便易乃手詔示天下行師用兵古之常道
取亂侮亡先哲所貴高麗莫離支蓋蘇文弑逆其主酷
害其臣竊據邊隅肆其蜂蠆朕以君臣之義情何可忍

若不誅翦遐穢無以徵肅中華今欲巡幸幽薊問罪遼
碣行止之宜務存節儉所過營頓無勞精飾食唯充飢
不須珍膳水可涉度者無暇造橋路可通行者不勞修
理御營非近縣學生老人等無煩迎謁隋室淪亡其源
可覩良繇智畧乖於遠圖兵士疲於屢戰政令失度上
下離心德澤不加於匹夫刻薄彌窮於萬姓當此時也
高麗之主仁愛其人故百姓仰之如父母煬帝殘暴其
下故衆庶視之如仇讐以思亂之軍擊安樂之卒務其

功也不亦難乎何異入水而惡其濡踐雪而求無迹朕
緬懷前載撫躬內省昔受鉞專征提戈撥亂師有經年
之舉食無盈月之儲至於賞罰之信尚非自決然猶所
向風靡前無橫陣蕩氛霧於五嶽翦虎狼於九野定海
內拯蒼生然則行軍用兵皆億兆所見豈煩言哉及端
拱巖廊定策帷宸身處九重之內謀決萬里之外北殄
匈奴種落有若摧枯西滅吐谷渾高昌易於拾芥苞絕
漠而為苑跨流沙而為池黃帝不服之人唐堯不臣之

域竝皆委質奉貢歸風順軌崇威啓化之道此亦天下
所共聞也况今豐稔之年家給人足餘糧栖畝積粟紅
倉雖足以為兵儲猶恐勞於轉運故多驅牛羊以充軍
食人無裹糧之費衆有隨身之廩如斯之事豈不優於
曩日加以躬先士卒親決六奇使攻無所守戰無所懼
畧言必勝之道蓋有五焉一曰以我大而擊其小二曰
以我順而討其逆三曰以我安而乘其亂四曰以我逸
而敵其勞五曰以我悅而當其怨何憂不尅何慮不摧

可布告元元勿為疑懼耳太宗憂百姓勞役凡有頓舍
供費之具減者大半焉

十二月甲寅詔曰觀乎天道鼓雷霆以肅萬物求諸人
事陳金革以威四方雖步驟殊時質文異制其放殘殺
禁暴虐戮于紀討未賓莫不扶義而申九伐文德昭於
率土因時而董三令武功成於止戈朕祇膺寶曆君臨
寓縣憑宗社之靈藉卿士之力神祇儲祉夷夏宅心故
上柱國遼東郡王高麗武夙披丹款早奉朝化忠義之

節克著於嶠夷職貢之典不愆於王會而其臣莫離支
蓋蘇文包藏凶慝招集不逞潛懷異計奄行弑逆寃酷
纏于濊貊痛悼徹於諸華篡彼藩緒權其國政法令無
章賞罰失所下陵上替遠怨邇嗟加以好亂滋甚窮兵
不息率其羣凶之徒屢侵新羅之地新羅喪土憂危日
深遠請救援行李相屬朕愍其倒懸之急爰命輕軒之
使備陳至理喻以休兵曾不知改莫遵朝命窺窬亭障
首竄窟穴完聚更切賦斂尤繁丁壯盡於鋒刃羸老弊

於板築久廢耕桑咸罹饑饉生肉表異顯其亡徵雨血
為妖彰其數盡比室愁苦闔境哀惶華髮青襟不勝苛
政延頸企踵思沾王澤昔有苗弗率勞大禹之駕葛伯
仇餉動成湯之師况亂常巨寇紊三綱而肆逆滔天元
惡窮五刑而莫大者哉朕以宵衣興慮日旰忘食討罪
之意既深於投袂救人之義彌軫於納隍類上帝而戒
途詔夏官而鞠旅可先遣使持節遼東道行軍大總管
英國公勣副總管江夏郡王道宗士馬如雲長驅遼左

奮夷嶽之威屠豕虵於險潰乘建瓴之勢斬鯨鯢於鏤
方行軍摠管執失思力行軍摠管契苾何力率其種落
隨機進討契丹蕃長於句折奚蕃長蘇支燕州刺史李
玄正等各率衆絕其走伏使持節平壤道行軍大摠管
張亮副摠管常何摠管左難當等舟楫相繼直指平壤
新羅王金善德傾其城邑竭其府藏荷不貲之澤復累
葉之讐出樂浪而衝腹心臨沃沮而蕩巢穴百濟王扶
餘義慈早著丹款深識時機棄歷稔之私交贊順動之

公戰羸糧蓄銳唯命是從凡此諸軍萬里齊舉頓天羅於海浦橫地網於遼陽朕然後經塗白狼之右親巡玄菟之城執鼗鼓而戒六軍載太常而麾八陣使流湯者魚爛握炭者冰消誅渠魁於惡稔弔黎庶於隕角其或擁衆力攻或間行自拔宜弘寬大各復農士有勞者當加其賞懷能者不滯其才如其長惡莫悟迷途遂往斧鉞既下必嬰喪元之悲玉石一焚徒軫噬臍之嘆具宣朕旨咸使知聞

十九年二月與駕發雒陽三月丁丑幸定州太宗謂侍
臣曰遼東舊中國之有自魏涉周置之度外隋氏出師
者四喪律而還殺中國良善不可勝數今彼弑其主恃
險驕盈朕長夜思之而輟寢將為中國復子弟之讐為
高麗討弑君之賊今九瀛大定唯此一隅用將士之餘
力平蕩妖寇耳然恐於後子孫或因士馬強盛必有奇
決之士勸其伐遼興師遐征或起喪亂及朕未老欲自
取之亦不遺後人也所以發自雒陽唯噉肉飯春蔬不

進慮有勞煩庶同艱苦一勞永逸是後將士每到者遣
於定州北門過太宗御城門樓撫慰之皆踴躍歌呼其
人心齊一自古出師命將未之有也壬辰車駕發定州
親佩弓矢手結雨衣於御鞍後詔司徒長孫無忌攝侍
中吏部尚書楊師道攝中書令太宗夙綜師旅躬善兵
筭此行也攻擊之勢軍將咸稟成規至於應變乘機長
孫無忌頗豫謀畧時李勣發柳城多張形勢若從懷遠
之路潛引師北趣燕之甬道而進出高麗不意焉

四月戊戌朔李勣師自通定濟遼水至玄菟所經烽戍
皆下之高麗大駭城邑各閉門不敢出壬寅江夏王道
宗率衆數千至新城折衝都尉曹三良率十餘騎直壓
其門下城中驚擾無敢出者癸卯於幽州城南大饗六
軍太宗御次詔長孫無忌宣旨以誓衆曰古先帝王爰
有征伐堯戰丹浦舜伐有苗文王戡黎成湯征葛此四
君者豈樂櫛風沐雨勞師疲衆以為不誅兇殘化不洽
不翦暴亂人不安高麗莫離支虐殺其主盡戮大臣自

餘黎庶怨入骨髓此等皆力不能制擁在寇城想望朕師若思膏雨高麗滅亡徵兆人誰不見時不可失天不可違朕豈厭重帷而安暴露薄華殿而樂風塵且以弱年行師頗識權變今者士卒咸集戈甲如山衝惻雲梯指影可捷夫農夫勤春乃始有秋士卒先力然後受賞若能齊力一心屠城陷敵高官厚秩朕不食言若敢遁逃違棄營伍厥身從戮罪及妻孥此皆邦國之典刑古今之常事記朕誓言誠宜自勉丁未輿駕發幽州壬子

李勣攻高麗之蓋牟城丁巳太宗次北平澄臨海戊午
烽望大壑癸亥李勣拔蓋牟城獲戶口二萬餘人倉糧
十餘萬石

五月乙巳張亮亞將程名振拔卑沙城其城四面懸絕
唯西門有攻之勢名振督軍夜襲之副摠管王文度先
登士卒繼進城中潰散虜其男女八千口分遣摠管丘
孝忠古神感耀兵於鴨淶水是日李勣進軍於遼東城
下庚辰車駕次遼澤丙子師次臨遼頓其夕遼水減三

尺三軍慶悅以為得天之助丁丑車駕渡遼撤橋梁以
堅士卒之心甲士六萬營於馬首山初太宗遣使於百
濟國中採取金漆用塗鉄甲皆黃紫引曜色邁兼金又
以五綵染玄金製為山文甲竝從將軍甲申太宗親率
甲騎萬餘金光曜日與李勣會於城下金鼓齊震旌旗
圍其城者數百里士衆之聲駭天聒地太宗見南風甚
急遣銳卒登衝竿之末執其西南樓騰烟扇烈焚其城
中屋宇樓閣須臾而盡太宗之發定州也遣自州東每

數十里而置一烽以至遼東城下烽端多積末葦須克
遼東城訖藝以報太子至是太宗知城必下麾無忌師
首戰馳至烽所藝之乃麾戰士登城高麗蒙楯拒戰天
子命拋車飛石繼中其楯壯士數百人攢長稍而攻之
高麗兵大潰其留戰者盡殪燒死者萬餘人牛馬犬彘
不可勝數俘其勝兵萬餘人口四萬收倉粟五十萬石
以其城為遼州丙戌詔曰五兵爰始軒皇戰於阪泉七
德攸基唐帝尅于丹浦莫不除翦暴逆克濟生靈斥土

開疆威加四海朕欽承寶曆削平天下六合之內咸以
為家三光所臨義無偏炤繇是環埤之表咸森森以航
深堦寓之中盡顛顛而面內而島夷陪隸虐殺其君毒
被朝鮮災流穢貊幼孤者不勝苛暴忠槩者仰我來蘇
朕言念匪人深懷夕惕親御戎軒躬執雲鼓意在以殺
止殺仁育被於羣生用刑清刑義征戡於不惠廓滔天
而調雨露擒猾夏以正封疆用此佳兵事非獲已仰申
天罰遂乃龔行先命行營大摠管英國公勳行軍總管

張儉等率領驍銳元戎啓行北狄西戎之首咸為將帥
奚雷契丹之旅皆充甲卒如貔萬計躍馬千羣揔萃遼東
之城攻其南面副大總管江夏郡王道宗第一軍總管
虢國公張士貴等率五陵之勁騎董六部之良家分麾
引道攻其西南申命前軍夔國公弘基等分統猛士填
其濠塹賊城地險激梁水以環流聳堞凌雲壓顏山而
靡懼於是雲羅四合地道九攻危城倏已復隍湯池俄
而失險猶且析骸窮壘壁巢幕以偷安轉骨深溝坐積

薪而待燎愍其塗炭申其再造頻加誨誘固執迷塗繇是猛士衝冠壯夫挺劍咸頓首於馬前請因機而電掃難違衆議爰詔許之乃分命諸軍四面雲合朕登高迥囑授其節度又命檢校太常卿鄒國公敬德領黃門之軍樂奏玄雲之雅歌將帥聞而增憤士卒繇其作氣于時凍雨初晴驚風漸急聊命縱火數處燿然焚其樓雉竝為煨燼合城男子面縛軍門取彼渠魁屬之司敗千載逋寇一朝清蕩斯竝宗廟威靈上玄幽贊忠臣猛將

盡節陳謀勁卒勇夫輕身効命叶同心力成此大功豈
朕一人獨能致此今茲尅捷普天之慶宜令頒下咸使
聞知乙未師次白巖城

六月丁酉李勣攻白巖城西南太宗臨其西北城主孫
伐音請降以城為巖州是日於蓋牟城置蓋州庚子詔
曰上天之道先德而後刑王者之師有征而無戰是以
炎農翦暴夙沙自縛其君玄德一興有苗不固其險朕
勞神濟物用百姓而為心則天弘化環四海而開宇義

非獲已繇是舉兵每蓄哀矜深存宥罪自濟遼水先令
告喻而蓋牟不革其面遼東猶抗其斧既觸天網遂縱
兵鋒未展鷹揚已皆魚爛朕乃鼓行乘勝師次白巖兇
徒相率登陴拒守因山構壘仰切浮雲縈澗疏隍下臨
無景妖氛蝟聚如憑劒閣之深同惡鴟張若負洞庭之
險乃命行營大摠管英國公勳等統咀彘冠雞之將率
挈螽斬蛟之士石發甚於星實樓毀同於山壤朕憫彼
同焚情深惻隱乃親御八駿幸勅三軍賊既倒懸方思

轉禍積甲齊於熊耳獲庾方於海陵建十州之旗各復
於桑梓反三韓之士不易於農肆焚櫬錫爵驅馳遼溟
之間鑿井耕田編列卞辰之野古人有言曰全國為上
蓋斯之謂焉又燕碣土風素多霖霖軒皇遭召雨之寇
晋后苦涌水之災自朕出師上靈幽贊旭日澄靄膚雲
輟陰所指未有堅城所向乃無完陣天道人事義等合
符窮穴傾巢庶將非遠宜以大慶頒示普天下未車駕
發自遼東丙辰次於安市城北列營進兵以攻之丁巳

高麗北部耨薩高惠真率高麗靺鞨之衆十五萬以援安市城帝謂侍臣曰延壽之來也其策有三若引兵直前連安市城以為壘據高山之險食城中之粟兼縱靺鞨之寇吾牛馬攻之則不可卒下欲歸則泥濘為滯此其上策若抽城中之人與之宵遁此其中策若不量其能近城列陣將與吾交鋒此其下策卿曹觀之彼必用下策若得縱兵決戰所謂成擒者也賊中有一對盧年老習事謂延壽曰吾聞中國大亂英雄竝起秦王聖武

所向無敵遂平天下南面為帝北夷請服西戎獻款今者傾國而至唐兵之壯健者悉來其鋒不可當也今為計者莫若頓兵不戰曠日持久分遣驍雄斷其餽運不過旬月軍糧必盡求戰不得欲歸無路此不戰而必取勝也延壽不從引軍直進遣騎候之云去安市城四十里太宗以為兵家之勢以逸待勞猶慮其低徊不至詔左衛大將軍阿史那社爾總突厥千騎以誘之誠曰鋒交而佯北其必乘爾而來也高麗嘗令靺鞨居前社爾

與之纒交而退高麗相謂曰此易與耳竟馳進軍於安市
城東南八里依山麓而陣帝召無忌及侍臣將軍等謂
曰夷兵既至塵埃亘數十百里彼衆我寡卿等所知國
家猛將謀臣竝從朕在破賊萬全之策云何無忌奏稱
古來帝王亦有以干戈靜亂而臨天下者多委將帥身
非英畧陛下往時平定海內年踰成童莫不披堅執銳
躬先士伍翦除干紀救蒼生之命鴻名遠震海外咸服
今所從將士多是幕府舊人雖復遠涉夷鄉而善陪神

武橫戈思敵人百其戰古人云將戰必觀士卒之情臣
適行經諸營衛士等聞高麗已至無不抽刀結旆喜見
於色徃平王世充及竇建德等臣蒙從征至於竒謀異算
多出睿旨用陛下妙筭無不就擒偶達成規必致負敗
今陛下親臨遼隊擐甲振嚮滅高麗之機在此一舉臣
等愚短破陣萬全之策不敢克當乞陛下指縱臣等奉
以行事太宗笑謂曰卿等既推筭於朕當為君料量因
與無忌等翼數百騎乘高以觀之覽其山川可以用竒

兵處遣給延壽曰我以爾強臣篡弑故來問罪即欲交戰非吾本意天子入境芻粟不給不能於中國轉運破爾數城以取廩食禮苟修則所失必復矣延壽信之竟夕而俟太宗夜召文武躬自指麾遣李勣步騎一萬五千於賊西嶺為陣長孫無忌率將軍牛進達等精兵一萬一千以為奇兵自山北於狹谷出以衝其後太宗自率步騎四千潛鼓角偃旌幟趣賊營北高峯之上勅諸軍聞鼓角聲而齊進因令所司張受降幙於朝堂之側

曰明日午時納降虜於此矣遂率軍而進是夜流星墜賊營中戊午延壽等見李勣兵欲與戰太宗遙望長孫無忌軍塵起命鼓角並作旗幟齊舉延壽等大懼將分兵承之而其陣已亂時有電雷助我軍威李勣率步卒一萬擊之延壽衆退長孫無忌縱兵乘其後太宗又引軍臨之賊因潰斬首二萬餘級延壽等率其餘寇依山自保迴望我軍擊其黨類悲號相召其聲甚哀於是詔無忌勣等引兵圍之無忌撤川梁以斷其歸路矣太宗按轡行

觀營壘謂侍臣曰高麗舉國而來存亡所繫一麾而敗
天祐我也因下馬再拜以謝天已未高延壽高惠真率
三萬六千八百人請降太宗引入轅門延壽膝行而前
拜手請命太宗謂延壽等曰東夷英少講張海曲至於
摧堅破敵故當不及老人而今而後更敢與天子戰否
延壽等咸伏地而不對辭簡鞠薩已下及酋首三千五
百人授以戎秩遷之內地餘衆三萬餘人並釋俘放還
平壤其謝恩於天子並雙舉手以顙頓地懽叫之聲聞

數千里外韎羯三千三百人盡坑殺之獲馬五萬匹牛
五萬頭光明甲一萬領他戰器械稱是遼東道行軍大
摠管李勣奏曰向若陛下不自親行臣與道宗將數萬
人攻安市城未克延壽等十餘萬抽戈齊至城內兵士
復應開門而出以救首尾旋踵即敗必為延壽等縛送
向平壤為莫離支等所笑今日臣敢謝陛下性命恩澤
太宗素狎勣笑而頷之延壽惠真等敗也高麗傾國震
駭後黃城及銀城竝自拔數百里無復人烟遮驛以報

皇太子仍書與申國公高士廉等曰朕為將如此何如
皇太子表請曰伏承聖躬去賊城不踰百步臣魂飛膽
戰莫知自處伏願思宗社之重以億兆為心收雷霆之
威駐矢石之烈臣之愚誠敢以死論及聞此語報曰吾
初向賊陣心竝在戰攻為憶汝之言所以不執斧鉞如
其不爾將大決戰此後必不親行陣勿為憂慮也因名
所幸山為駐蹕山令將作造破陣圖竝命中書侍郎許
敬宗為文勒石記其迹

七月辛未移營安市城東嶺八月丙午移營於安市城南自帝渡遼凡十徙營但明斥堠未嘗為塹壘軍士從蓋牟遼東等城運糧單人匹馬所至野宿如中國焉雖賊城高麗終不敢竊抄令李勣江夏王道宗攻安市城六旬不能克

九月癸未太宗以季秋草枯遼塞寒烈勅諸軍收攻安市城器械即命班師先遣拔遼蓋二州戶口渡遼乃召馬軍萬騎步卒數萬披甲持戟張旗幟耀其城下而旋

城中皆屏聲偃幟城主升城拜手奉辭太宗嘉其堅守
賜縑百匹以勵事君者詔李勣道宗統馬步數萬人為
後殿乙酉次於遼東城下城中尚有粟十萬石軍士取
之不能盡丙戌渡遼水至渤錯水十里間遼澤餘潦車
馬不通詔長孫無忌楊師道率文武官寮及征兵萬人
斫草填道而進水深之處以車為梁道太宗憂梁道不
成自積柴馬上詣無忌等以助役

十月丙申朔次蒲溝填路未畢太宗駐馬以督之及兵

渡渤鍇水暴風降雪時甚冰寒士卒沾凍馬牛溺於泥
水死者甚多詔遣積火以待之渡兵賴以獲濟初太宗
軍及李勣軍之入遼也將十萬人各有八馱兩軍戰馬
萬匹及還戰士死者一千二百人其八馱及戰馬死十
七八張亮水軍七萬人泛海遭風溺死者數百人凡徙
遼蓋巖三州戶口入內地前後七萬人丙午次營州癸
丑詔曰朕聞之聖人慎罰觀兵於再駕明王舉事制勝
於三年合諸侯以討逆既擒而且縱摠海內以除殘臨


行而止殺其故何哉信繇上天之德曰生王者之師曰
義是以網開三面干舞七旬豈有恣欲稜威取鯨鯢而
竭澤覆巢探穴罄麇卵以塗原者乎憬彼島夷之州僻
居鯤壑晉皇淹駕纔克一城隋帝頻卽淪兵百萬朕光
承寶歷思救普天陶化紫宸法兩儀而導俗推心黔首
狗萬寓以勞神纖介不安終宵輟寢蠻陬未艾日旰忘
食是以遠涉天崖比焦原而未險長驅若木譬平圃以
非遙憤角遼陽躬親節度捫金海表震曜威靈尅其玄

菟橫山蓋牟磨米遼東白巖卑沙麥谷銀山後黃等合
一十餘城凡獲戶六萬口十有八萬覆其親城駐蹕建
安合三大陣前後斬首四萬餘級降其大將二人裨將
及官人酋帥子弟三千五百兵士十萬人竝給程糧放
還本土又獲馬牛各五萬餘館穀十旬不假贏糧之費
徒兵累萬咸發兼乘之歌自夏涉秋係虜相次繇燕及
雍襁負不絕緬惟湯文取亂嘗懷偃伯之心虞夏勝殘
寔弘光被之美有懷戢武造次何忘但以賊帥莫離支

猶不授首舉圖未果志無旋旆忽屬徼外霜嚴海濱寒
摠念茲兆衆便命班師朕所向必摧上靈之祐也所攻
無敵勇夫之力也方且聊酬玄澤展大禮於郊禋賽此
勤勞錄摧鋒於將士有勲者別頒崇命無勲者竝加優
卹諸渡遼海人應加賞命及優復者所司宜明為條例
具狀奏聞朕將親覽詳以申後命丙辰太子奉迎太宗
自發定州御一褐袍將與太子別謂曰俟見汝日方更
之耳繇是春夏嘗御雖盛暑流汗弗之改也及秋中褐

竝穿敗羣臣咸請改易太宗曰軍中士卒多衣弊衣吾
自服新衣非將領之情至有數十處穿穴太子引之盡
數是日次圍山太子以新衣進御太宗始服之

二十年三月車駕至自遼東獻俘授馘備法駕具凱旋
禮蠻夷君長及京邑士女夾道陳觀者填塞咸稱萬歲



冊府元龜卷一百十七

欽定四庫全書

子部
冊府元龜卷一百十八

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣王瓚

謄錄監生臣李永寧

欽定四庫全書

冊府元龜卷一百十八

宋

王欽若等撰

帝王部

親征第三

唐玄宗開元二年十月吐蕃復侵渭源帝思親征乃下
制曰朕聞夷不亂華既殊於中外虜或犯塞必興於甲
兵我國家一戎定業累聖膺期干戚斯舞梯航畢至小
蕃遠寇假息游魂爰自昔年慕我朝化申以婚姻之好

結為舅甥之國歲時往復信使相望繒繡以益其饒衣冠以增其寵鴻恩大造特加於蠻貊狼子野心遂同於梟獍在於亭障頗開驚擾已命師徒過往追躡摧兇殄逆今也其時滅迹掃塵期之不日然以問罪之義百王所以龔行戒嚴之典六軍所以親御是用中宵按劍昧曉求衣豈自逸於崇高而不勤於櫛沐眷茲右輔遠界西陲雖駐蹕之暫勞佇觀兵而決勝宜取今月擇日進發其差取後軍四萬人諸色蕃兵二萬人京兆府兵一

萬人飛騎二萬人量追三百里內兵留當下人充萬騎
五萬一千人幽隴兵各二千人岐州兵五千人並集本
州待進止其馬四萬匹取三百里內諸廐及府馬充所
追兵馬及押官委本州精簡赴集衛尉卿兼檢校左金
吾大將軍王毛仲為左一軍總管右金吾將軍康海源
為副左武衛大將軍李昌為右一軍總管左武衛將軍
馬銜為副左羽林大將軍趙成恩為左二軍總管右領
軍將軍衛秦義禮為副右羽林將軍楊敬述為左三軍

摠管右領軍將軍鮮于庭誨為副左羽林將軍馬崇為
右三軍摠管右監門將軍執失善光為副所司准式俾
其長驅隴坻深入湟中授以方略掃清氛祲其緣頓支
俱務從省約丁巳勅曰戎狄憑陵每勞征戍比興師旅
猶未掃除緣邊之人頗有其患朕為父母實用憂勤今
欲親案邊疆躬行弔伐宜令朝廷召募勇夫壯士拔萃
逸羣者稱為屯衛飛騎且各量與賜帛行廻之日簡入
羽林自餘之人取為長行仍令兵部侍郎韋抗紫微舍

人王珽即於朝堂簡募十日內具所得人姓名奏聞戊
午至自溫湯命左驍衛大將軍裴元哲領兵二萬人馳
驛往隴右與薛納同討逆虜薛納引兵至渭源遇吐蕃
賊數萬戰於武階驛與王峻犄角夾攻之大破賊衆追
奔至洮水又戰於城堡豐安軍使王海賓先鋒力戰死
之將士乘勝進擊又敗之獲數萬人擒其酋率將士盡
收其所掠羊馬并獲其器械不可勝數時帝方欲親征
及聞納等克捷大悅遂停親征

後唐明宗天成二年十月乙酉帝幸汴州戊子至京水
店汴州分巡院官王榮走馬報朱守殷已叛帝親統禁
軍倍程先進已丑師臨汴州四面逼之人百其勇鬪不
踰時城潰而入戮其黨類晡晚收軍當日寧帖告諭天
下曰朕以名藩龍潛舊地思覃風教爰議巡遊今月九
日至滎陽得朱守殷詐奏稱本道都指揮使馬彥超等
欲謀叛逆輒使殺害尋令宣徽使范延光徑往撫諭自
後更無申奏節度使宋敬殷及使臣十餘並遭陷沒至

十日探知虜掠近城居人上城閉門顯為拒捍朕親御
六軍徑臨孤壘守殷逆黨敵於鄭門百姓望風下城效
順守殷一家遂自屠戮尋獲首級已復城池且朱守殷
久事本朝繼膺重委洎朕繼承宗社前後累降渥恩統
處尹宗薦居節制位兼將相貴極人臣此謂戮力一心
贊時為國殊不知潛懷梟性暗畜狼心全無事上之忠
遽恣欺天之意遂加誣於都校兼殺戮於近臣驅脅生
靈拒張車駕果貽衆怒誅厥全宗兇狂之釁自招悖逆

之辜莫追一方既靜萬國永安凡所聞知當極慶快如有諸色人被朱守殷密行文字妄有扇搖蓋慮奸細黷黷良善朕皆明察不汝疵瑕當各安懷勿為挂慮庚寅帝御玄德殿受賀宣陝府節度使石敬瑭權知汴州事辛卯百官自鄭州到立班稱賀

臣欽若等曰後唐莊宗雖稱尊號未至河南其

中征伐並具創業門

晉少帝天福九年正月乙亥滄鎮貝鄴馳告契丹前鋒趙延壽趙延昭領兵五萬將及甘陵是日發兵六千屯

澶淵以待之庚辰以宋州節度使高行周為北面行營都部署河陽節度使符彥卿為騎軍左排陣使宿州刺史梁進明副之神武統軍皇甫遇為騎軍右排陣使懷州刺史薛懷副之陝府節度使王周為步軍左排陣使泌州刺史劉詞副之羽林統軍潘環為步軍右排陣使麟州刺史尹實副之護聖左右廂主王景王萬敢為騎軍左右將慈州刺史周景殷武衛將軍張鵬監護奉國左右廂主李殷程福贇為步軍左右將閤門使蕭處仁

高勳監護前絳州刺史劉在明為先鋒都指揮使衛州
刺史石公霸副之坊州刺史陳思讓監護又以前單州
刺史劉禧為都壕寨使前階州刺史姚武為都橋道使
壬午詔曰朕以恭承先旨尊奉北朝無事不隨有求皆
應竭國家之財用務蕃漢之歡和豈謂貪殘終隳信義
直驅鐵騎深犯封疆如是憑陵安能俯就顧師徒之憤
惋念生聚之凋傷頃議親征用平燕薊蓋救驚搔之患
寧辭跋涉之勞取此月十三日躬御六師北征攜貳指

期旦夕悉溢氛靈凡爾百寮當體朕意以前邠州節度使李同為東京留守前晉州節度使周密前同州節度使李懷忠為東京巡檢使乙酉帝離京戊子鎮邢維德四州告攻圍日急辛卯講武於北都甲午以北京留守劉知遠為幽州道行營招討使鎮州節度使杜重威副之定州節度使馬全節為都虞候職員將校委招討使便宜署置丙申虜以偏師寇黎陽遣右武衛上將軍張彥澤亳州防禦使李萼坊州刺史陳思讓率勁騎三千

拒之辛丑太原奏與契丹偉王戰於秀容斬首三千級
生擒五百人獲其大將一十七奪得偉王金槍鐵甲及
旗幡等潰散敵軍入鴉鳴谷已進軍襲之三月丙午先
鋒指揮使石公霸遇敵數萬騎於戚城之北為敵所圍
高行周符彥卿在城之東南方息於林下忽聞衆至駭
愕督軍而進纔數千騎衆寡不較行周遣人馳告景延
廣請益師延廣遲留俟帝進止既而行周等為敵圍之
數重三人大譟瞋目奮擊契丹傷死者甚多帝自御親

兵援之前軍獲免戊申李守直等軍至馬家渡敵步卒
萬人方築壘濬隍以騎軍散列其外舟楫數十猶渡兵
未已我師搏之敵騎退走遂攻其城四面樹梯一鼓而
上敵衆大敗乘馬赴河溺者數千西岸敵軍數萬鼓譟
揚旗以脅我軍及見東岸俘執斬刈大半陷沒水中即
大哭而去是日獲敵馬八百匹執敵將莫城義節樓使
崔裕先鋒梁思榮契丹大首領信悉兵馬都監常尊王
令威吐渾將黨大地羽林使閻令省軍校張興王佐卿

張令霸等魁首七十八人部典節級五百人送於行在
餘衆數千即時斬之辛亥夏州節度使李彝殷銀州刺
史李彝洺合蕃漢之兵四萬抵麟州濟河侵契丹之境
易州刺史安蕃約戰契丹於北平獲車馬兵仗敵走保
和溝關斷其橋梁而還乙卯梁州刺史康彥進率兵侵
瀛州破荆窠北薛二城己未定州節度使馬全節率州
兵掠秦州破白團城生擒敵軍七百人獲牛馬千餘及
器械八百滄州奏敵皇城使李珂領兵三千援送所掠

男女三千餘人及貨具等長蘆而歸尋率輕騎攻其不
意斬獲千餘人人口輜重悉委之而走三月癸酉朔契
丹耶律德光領兵十餘萬來戰是日高行周前軍在戚
城之南既午其將趙延壽趙延昭以數萬騎出於王師
之西德光以鐵騎出我師之東接戰交相勝負至晡時
德光以勁兵中央而來帝亦出親軍列後陣二陣俱列
東西偃月際於河涘旗幟鮮威士馬嚴整德光望之懼
形於色謂左右曰楊光遠言晉朝兵馬半已餓死今日

觀之何其壯耶敵騎往來馳突左折右旋我師植立不動萬弩齊發飛矢蔽地馬行其中多所躓蹶賊軍稍却王師亡命者告德光曰南軍東面人少汳河城柵不固宜併兵攻之德光乃令千騎為隊前銳後方攻其東首李守貞薛懷讓以勝兵數千急赴之大戰王師敗時夾馬軍士千餘人在堤間治水寨使人急召之旗幟之末出於堰埭敵以為偽遁伏兵所起遂整軍而立良久復戰守貞在戰之後立馬於大塚之端去陣三百餘步不

敢寸進俄頃王師又退至塚下李守貞以數百騎短兵直進擊之敵稍退戰場之地人馬死者無算斷箭殘鏃交橫厚數寸既而昏暝乃擊鉦而去夜行三十里乃收合夷傷萃於野次甲戌太原鎮定咸奏已各離本部刻期於邯戰會合師徒乙亥契丹帳內小校竊德光所乘馬來奔辛巳傳木書收軍北去四月帝還京

開運元年十一月壬申詔曰朕以蕃寇未平邊陲多事選求將帥徵發師徒北面屯軍汾河守禦即日雖無侵

軼亦須廣設隄防朕將親率虎貔躬擐甲冑俟聞南牧
即便北征不須先定日辰別行曉諭所有供億支用宜
令三司預自指揮令隨從諸司職員並宜嘗備行諸俟
不得朝覲亦不得以進獻供侍借斂吏民凡百臣寮當
體是意

二年正月乙丑離京二月丙子次澶州大閱諸軍於戚
城東帝乘馬指揮於軍中丁丑復大閱列左右陣戎容
甚肅帝親乘馬指揮至晚還行宮己卯勅以許州符彥

卿充北面行營馬軍都指揮使統軍潘環充北面行營
步軍都指揮使壬午定州易州各差人奏契丹攻圍祁
州癸未宣差皇甫遇領馬步軍兵士二十九指揮天威
兵士二千一百八十人進發是月契丹陷祁州刺史沈
斌死之三月甲辰都招討使杜威奏今月八日臣與都
監李守貞副招討馬全節安審琦皇甫遇等部領大將
發赴定州易州刺史安審約奏二月三日夜差壯丁三
百人入敵寨斫營戮敵約千人損馬七百匹又據狼山

諸寨稱相繼邀殺蕃軍不少庚戌杜威大軍攻泰州刺
史晉廷謙以州降獲守城兵士三百八十九人辛亥易
州安審約奏狼山守把孫方簡掩殺得其渠諧里相公
一千餘人奚車一兩內有諧里妻及奴婢等甲寅杜威
收復滿城獲契丹首領沒刺相公及守城兵士一千九
百六十四人內七百人是新蔚二州兵士並放歸本道
其一千二百人是契丹監送次乙卯收復遂城縣其守
城契丹留六十三人首領餘並處斬丁巳杜威退還秦

州是日契丹前鋒至涿州戊午杜威大軍在泰州契丹前鋒至矣己未大軍離泰州契丹踵其後是夜營於方順河側敵亦相隨立牙帳己未大軍次陽城庚申契丹萬騎如牆而來大軍步卒排斗底陣騎軍鬪二十餘合午後張彥澤皇甫遇符彥卿等選勁騎擊之遂行千餘里北渡白溝而去癸亥戰於白圍谷是日契丹主在奚車中及軍敗走車行十餘里追兵既急獲一橐駝乘之而走乙丑杜威大軍自定州班師赴鎮州勅曰睽唯泰

郡素乃漢疆偶隸殊域久罹塗炭遇王師之進討傾臣節以來降况地處要衝人推勇悍將控臨於強敵宜係屬於雄藩其秦州宜割屬定州為屬郡以狼山寨主孫方簡為秦州刺史仍檢校尚書右僕射本州守禦都指揮使充定州東西面都巡檢四月丙寅朔北面軍前遣人走馬報前月二十八日殺戮敵軍大敗是月帝還京漢高祖天福十二年九月御札曰朕自副推崇敢忘寅畏及物必加於恩信任人無間於親疎期區宇之大同

俾蒸藜之小秦洎朕始臨梁苑畢會藩侯蓋當再造之
期用普維新之命莫不駿奔入覲率俾爭先旌旄之寄
咸遣帶礪之盟益固魏博杜重威負釁雖重在朕含垢
亦深盡捨前非只期後效是以授之真秩換彼名藩而
襁胎已成臭氣復作北勾冒頓南拒朝章若不加誅何
以為法黷我天憲勞我兵威今則大進梯衝克收壁壘
重念一夫作孽百姓何辜雖已推祝網之仁尚宜軫納
隍之慮必恐孤城既拔衆怒猶深儻驚颺更迅於雷霆

即烈焰寧分於玉石朕所以軫傷在念想慮尤深將親勞於六師宜再詢於順動豈辭櫛沐須議省巡取今月二十九日車駕起離闕下暫幸澶魏已來凡百士庶宜體朕意

十月戊戌帝至鄴城阮亭駐蹕行府節度使高行周率羣校奉迎午後帝次御營丙子宣遣高行周督諸軍分攻城四面是日諸軍將士所傷甚衆宣遣還營始一日前諸軍入謁行宮奏請攻城帝曰朕本意自來者止為

魏民久嬰城塹有倒懸之危復以重威執迷抱恥無出處之計今欲示之以武威來之以大義恃其恩待必見歸投若使城中億萬之命重遭塗炭何以表朕弔伐之意也如衆議須意攻迫但益兵張勢可矣時宰執奏曰兵法云夫有金城湯池內無積粟雖善戰者不能守况重威城孤兵散勢窮力殫輿櫬請死期在旦夕而已睿意所宣生靈大幸足以彰陛下有殷湯開網之仁也乙未帝乘馬巡城宣遣諸軍以竹籠橋布列架壕水攻擊

至未時還宮丁卯諸軍馬步兵士一千餘人各願充梯頭於行宮見帝面賜慰勉以俟指命壬申杜重威與妻石氏即石晉宗國長公主也相次遣牙校崔華鄭進齋表獻款乞赴行在甲戌又遣觀察判官王敏賚表赴行宮丁丑重威出降鄴都平

是日除重威守太傅中書令楚國公

周太祖廣順二年正月勅曰兗州節度使慕容彥超不知恩信輒恣兇狂北則勾喚劉崇南則結連淮寇劫掠鄰縣邀截路行差補元隨主持鎮務一向殘害生聚百

般誅斂貨財贍養姦兇圖謀悖亂割剝之苦所不忍聞
朕每為含容欲全終始近據東西諸處申奏慕容彥超
偏於管內抽點鄉軍人戶不伏追差逐處殺劫鎮將又
懼挾讐屠害悉是逃竄山林言念衆多盡能忠孝嗟我
赤子遇此亂臣方當寒凍之時可想艱辛之狀須行弔
伐以救孤危今差侍衛步軍都指揮使曹英等統領大
軍往彼問罪已指揮告報諸軍入兗州界並不得下路
村舍斫伐桑棗驅虜牛驢毀拆舍屋發掘墳墓如有犯

者便行軍令候至城下委曹英散行指揮安撫人戶兼
勒諸縣令依舊勾當公事仍差使臣於兗州四面邊界
招喚百姓令著營養如有惡黨接便為非者即就彼處
斷其人戶不得更於堡寨團集仍勒縣鎮官員節級明
具朝廷指揮告報勸課農桑無失春計兼自前有兗州
管內人戶被慕容彥超迫虜誑惑誘引見在州城內者
及有元在兗州充職人等必是逐人各有骨肉房親在
城今官中一切不問宜令州縣倍加安撫勿縱節級所

繇衷私恐嚇若有全家並在兗州城內者或有莊田店
宅及諸般物產如元有人勾當勒一切仍舊若無人主
張即委鄰人檢校看守勿信任人妄有占據及毀拆斫
伐候收復城池分付本主一夫作亂萬姓何辜興言疚
懷傷歎無已故茲告諭各令知委曹英等討之數月未
克四月內出御札曰昨以慕容彥超違負國朝閉據城
壘尚稽顯戮未決羣情方屬災蒸正勞師旅朕恭臨萬
國深居九重處宮闕之清虛雖然遂性念將士之勤苦

寧免疚心暫自省巡往申慰撫况非遠路不至甚勞凡我臣寮當體茲意朕取五月五日進發離京赴兗州城下慰勞行營將士沿路側近節度防禦團練使刺史不得離本州府來赴朝覲其隨駕一行供頓並取係省錢物准備差侍臣勾當仍預告報一路州縣並不得別有排比其隨從臣寮內外諸司官中已有供給州縣亦不得別有破費祇供其要載動用什物車乘亦已指揮備辦如闕少之時候見宣命即得供應只不得預前排比

如東私有人小小取索並不得應副或軍都及諸色人
於路途店肆買所須什物先還價錢兩京留司百官只
於遞中附表起居時熟不用差官至行在沿路所指揮
事件車駕迴日亦依此施行以樞密副使鄭仁誨權大
內都點檢以中書侍郎同平章事判三司李穀權東京
留守兼判開封府侍衛馬軍都指揮郭崇在京都巡檢
庚申帝發京師戊辰至兗州城下乙亥旦藥元福部下
兵如羊馬城遣奏帝帝出宮督諸軍繇是鼓譟而進勇

奮之勢不可遏帝遣中使至南寨促王峻進軍迫城峻部下軍爭登城壘賊衆奔潰官軍遂入直抵牙門慕容彥超親率其黨來抵官軍官軍退却緣城而出會城北大軍已攀堞而入彥超復結隊死戰虎捷都指揮使杜珣東西班都虞候薄令遷死之少頃城南諸軍復入彥超勢窘乃與妻投井而死彥超長子繼勳與徒黨五百餘自東門奔帝遣騎兵追之王峻亦領親騎追及盡殺之生擒繼勳以獻六師大掠城中死者萬人兗州平

世宗顯德元年三月癸未內出御札曰朕自遘閔凶再
經晦朔山陵已卜日月有期未忘荼蓼之情豈願干戈
之役而河東劉崇幸災樂禍安忍阻兵乘我大喪犯予
邊境勾引蕃寇抽率鄉兵殺害生靈覬覦州郡朕為萬
姓之父母守先帝之基扃聞此侵凌難以啓處所宜順
天地不容之意從驍雄共憤之心親御甲兵往寧邊鄙
務清患難敢避驅馳凡在衆多當體茲意朕取此月十
一日親率大軍取河陽路親征汴平妖孽永泰寰區應

沿路排當並不得差遣百姓科配州縣及於人戶處借
索劫掠遠近節度刺史並不得輒離理所求赴朝覲應
諸司各宜應奉公事者即仰從駕諸無事者不在扈隨
務從省要免至勞煩故茲札示想宜知悉以樞密使鄭
仁誨為東京留守乙酉帝御戎服親摠六師出東都壬
辰次澤州未晡帝披甲具戎器觀兵於東北郊郊距州
十五里夜宿於村舍癸巳前鋒與賊軍相遇甲午賊陳
於高平縣南之高原有賊中來者云劉崇自將騎三萬

餘騎嚴陳以待王師鄉兵不與其數初偵邏者云崇營於八議關關南距高平四十里契丹聚於長子縣賊將張暉領三千餘騎為前鋒帝慮其奔遁促兵以擊之崇東西列陣頗亦嚴整河陽節度使劉詞帥師在後勢未相繼羣情私相惴恐惟帝銳氣益振乃命侍衛馬步都虞候李重進與滑州節度使白重贊將左居陣之西廂侍衛馬軍都指揮使樊愛能步軍都指揮使何徽將右居陣之東廂宣徽使向訓鄭州防禦使史彥超以精騎

當其中殿前都指揮使張永德以禁兵衛蹕帝介馬觀陣兩軍交鋒未幾樊愛能望賊而遁東廂騎軍潰亂步卒數萬皆解甲投賊呼萬歲數聲帝覺勢危乃自率親

騎臨陣督戰時太祖馳騎於陣前

臣欽若等曰自此以後言太祖者皆皇朝

太祖歷試之事

先犯其鋒萬旅觀之無不披靡繇是戰士皆奮

命爭先賊軍大敗日暮賊萬餘阻澗而陣會劉訶領兵至與大軍追之賊軍又潰臨陣斬賊將張暉及偽樞密使王延嗣諸將分兵追襲勢若風雨殪尸棄甲填滿山

谷初夜王師至高平降賊軍數千人所棄輜重兵器馳馬及偽乘輿器服等不可勝紀壬寅以天雄軍節度使衛王符彥卿為河東行營一行都部署兼知太原行府事澶州節度使郭崇副之宣徽南院使向訓為監護侍衛馬步都虞候李重進為行軍馬步都虞候鎮國軍節度使王彥超為先鋒都指揮使領步騎二萬進發討賊乃詔河中節度使王彥超陝府節度使韓通自陰地關入與符彥卿會合進軍又以河陽節度使劉詞為隨駕

都督署鄜州節度使白重贊為副五月甲戌朔帝宿於
團栢谷乙亥次落漠驛丙午至太原城下駐蹕於行宮
符彥卿率諸將已下來見庚辰命彥卿郭從義向訓白
重贊史彥超等率步騎萬餘赴忻州蓋自忻代歸順之
後契丹猶在境故命諸將進軍以討之帝復耀兵城下
癸未幸城西命諸軍飛礮以擊城乙酉親領六師巡城
戊子幸太原城之東引飛礮擊其門壘而旋庚寅城之
四面設洞屋飛礮之具辛卯領親騎迫其東門仍以飛

礮擊之壬辰帝巡按四面軍若癸巳遣李筠張永德以三千騎赴忻州時符彥卿等以契丹在忻北請益兵以驅之故遣筠等往焉六月癸卯朔帝巡賊城親御軍士已巳遲明帝發自太原夕次於來遠驛是行也大集兵車及徵山東懷孟蒲陝丁夫數萬修洞屋雲梯以攻其城旦夕之間期於必取會大雨時行軍士勞苦又聞忻口之師不捷帝遂決還京之意庚午至自太原

三年正月帝將南征庚子御札曰朕以中原雖靜四表

未寧臨戎罔憚於躬親問罪須勤於櫛沐今訓齊驍銳
巡幸邊陲用壯軍容永安國步宜取此月內車駕進發
暫幸淮上凡闕舊儀有司准式以宣徽南院使陳州節
度使向訓為權東京留守兼判開封府事以端明殿學
士左散騎常侍權知開封府事王朴為權東京副留守
命曹州節度使韓通權點檢侍衛司及為在京內外都
巡檢以權判三司張美為大內都點檢是日宣侍衛都
指揮使歸德節度使李重進領兵赴晉陽壬寅帝南幸

丙辰至壽州城下帝親率六師圍其城數匝號令之聲振於原野列御營於州西北淝河之涘以駐蹕焉丁巳徵宋亳陳潁徐宿許蔡等州丁夫數千萬以備攻城之役又命中使高彥彬等四人各領兵於壽州四面安撫編戶及禁其俘掠又命侍衛步軍都指揮使李繼勳領兵於城之南效順都指揮使唐景愨領兵於城之東各進洞屋雲梯以攻之壬戌太祖上言敗淮賊萬餘衆於渦口斬偽兵馬都監四方館使何延錫靜江軍使李鐸

等於陣擒偽壽州節度使劉仁贍姪天忠指揮使崇浦
及獲戰船五十餘隻初吳人遣軍萬餘衆維舟於淮列
砦於塗山之下上命太祖領鐵騎數千以襲太祖將至
賊砦十餘里復其餘軍遣輕騎百餘扣其砦門與之交
鋒既而為偽遁之勢仍令數騎棄其馬而遁吳人得其
馬大喜因鼓譟而來離其砦數里太祖奮伏兵以擊之
殺獲殆盡死者不可勝紀

二月甲戌徐州遣牙將王崑押泗州牙校王知朗齎江

南國主李景書一函來上書云唐皇帝奉書於大周皇帝不答戊寅命鄧州節度使侯章為攻取賊水砦都部署右驍衛大將軍王環副之四月乙亥帝至濠州駐蹕於其城南己卯韓令坤上言敗楚州賊將馬在貴等萬餘衆於灣頭堰獲偽連州刺史秦進崇等是日殿前都指揮使張永德上言敗泗州賊軍千餘人於曲溪堰先是江南既失揚州乃令隣郡悉發部兵同謀收復至是皆為我師所敗庚辰詔諭諸道曰朕自渡長淮尋清千

里戎輅方期於南下金陵哀告而上章乞駐禁軍稱臣待罪念其危迫未遣攻收不謂忽逞狂謀又屯殘寇韓令坤趙

太祖諱

憤其姦詐戮力掃除銳旅纔交賊徒大敗

生擒偽將盡奪樓船貯於旦夕之間便見澄清之運凡聞克捷諒極懽呼五月自宿宋還京六月李繼勳攻壽州為賊所敗時李重進駐軍於其城北聞繼勳之敗幾不能守將議退軍會太祖自六合領兵歸闕路出於壽春因為駐留旬日重進倚以為援故其軍復振

四年正月戊申御札曰朕躬臨庶政志靜八方顧淮海
之未賓命師徒而致討克捷相繼殺獲甚多料彼孤危
安能抵拒然以將士在外攻戰踰年竭力盡忠摧兇破
敵念茲辛苦嘗軫憂勞暫議省巡親行慰撫且地理之
不遠諒迴復以非遙今取二月內暫幸淮上應自來緣
路供頓務從省略凡有費用並以官物供備所在不得
科配其諸約束條件一如近年巡按之例二月甲戌以
樞密副使王朴為權東京留守兼判開封府事以內容

省使咎居潤副焉以三司使張美為大內都巡檢以侍衛都虞候韓通為京城內外都巡檢乙亥帝衣戎服率步騎數萬繇薰風門出三月己丑次石碛山瞰山川之形勢是夜大陳師旅繇浮橋濟淮抵壽州之北庚寅旦帝躬擐甲胄擁兵於紫金山南乃命太祖領殿前諸軍擊賊先鋒砦一鼓而破之斬吳寇千餘級餘衆復保山砦攻之未下帝復命太祖領兵伏紫金山攻一砦破之又殺獲賊軍二千餘衆遂斷其來道繇是賊兵首尾不

能相救至暮帝分兵守其城砦廻次於下蔡行宮辛卯
夜偽監軍使朱仁裕孫璘等相次各舉其砦來降降其
卒萬餘衆帝慮其餘黨沿流東潰遽命步將趙晁率舟
師數千沿淮而下是日帝復領兵次於趙步詰旦淮南
岸賊之大砦已為王師所陷殺獲萬餘衆擒賊將偽應
援使建州節度使許文顯偽應援都軍使前湖南節度
使邊鎬等其餘黨果沿流東下帝遂自趙步領親騎數
百循淮之北岸以逐之又命趙晁等諸將縱舟師順流

以擊之時太祖於淮南岸追擊賊卒或殺或溺殆將萬數日既晡帝乘勝馳騎至荆山洪洪距趙步蓋二百餘里沿路又有雒口等砦皆迎刃而下之殺溺之外擒賊軍數千人獲戰艦糧船共數百餘隻稻米七萬餘石鎧甲三萬餘副克捷之速未之有也是夜帝入於鎮淮軍以駐蹕焉甲午詔發近縣丁夫數千城鎮淮軍軍有二城夾淮相對仍命徙下蔡浮橋維於其間甲辰幸壽州城北耀兵而還丙午壽州劉仁瞻奉表請降戊辰帝

率六師於壽州城北受劉仁贍降詔諭天下曰朕昨者
再舉銳師重清淮甸憑玄穹之助順賴將相之協心盡
至援軍便臨孤壘劉仁贍智勇俱竭請罪軍門相次遣
男奉表輸誠乞全生聚今月十一日大陳兵衆直抵城
池劉仁贍率在城兵士一萬餘衆及軍府將吏僧道百
姓等出城納款尋便撫安壽春既靜於煙塵江表竝同
於文軌遠聞克捷當慰衷誠丙辰帝議還京四月至自
壽州東京留司文武百官迎見於高砦鎮且以勝捷稱

賀上顧盼者久之兵部尚書張昭因伏奏於馬前曰陛下昨離京之日臣等親奉德音期以兩月還京今纔五十餘日矣料敵班師皆如睿算臣等不勝慶忭再拜呼萬歲上大悅十月戊辰降御札曰向者以淮甸未平王師致討實賴忠貞之力繼成克捷之功漸屬嚴凝念彼征役况今邊陲無事軍旅正雄須議省巡親躬撫問將布混同之化罔辭擲沐之勞止期一兩月間車駕却還京闕凡在中外當體朕懷今取此月內暫幸淮上應往

來沿路供頓務從省畧凡有費用並以官物供備所在
不得科配已巳以樞密使王朴充東京權留守三司使
張美充大內都點檢壬申帝離京丁亥至濠州城西設
御營以駐蹕焉戊子帝親領兵破賊砦一所殺淮賊數
百人砦在濠州東北十八里灘上其灘廣袤數重淮水
浸而圍之乃濠上之咽喉先是賊據其地泊舟楫以自
固恃其四面水深謂我師必不能濟帝之將行也令悉
索行在橐駝以往臣寮咸不喻其旨及至命甲士數百

人跨橐駝以濟癸巳帝親領兵於濠州城下分命諸軍
攻破賊城水砦斬獲數百人先是賊以戰船數百泊於
城北植木於淮以梗我舟師之路是日辰時帝乘勝命
水軍鼓戰棹以往盡拔其木因縱火焚其巨艦四隻戰
船七十餘隻斬二千餘級餘衆皆自溺死至午時又命
大軍攻破羊馬城殺賊軍五百餘人自此城中膽破矣
丙辰夜偽濠州團練使郭廷渭差人賫陳情表來上且
言家在江南慮既降之後擬孛戮之禍欲先令人稟命

於李景望許令健步南去帝尋降璽書慰諭亦俞其請
辛丑帝聞渙河已東有賊船數百隻聲言來救應濠州
乃親領甲兵及發戰棹水陸東下連夜而行時太祖率
精騎前導癸卯大破淮賊於洞口斬級五千收降二千
餘人獲戰船三百餘隻因鼓行而東所至皆下太祖乘
戰船以逐淮寇至暮為賊船所圍太祖引滿射殺數人
淮寇稍却因縱兵以擊之斬其將卒百餘人餘皆棄船
自溺死者甚衆因盡焚其舟楫乙巳至泗州城下太祖

率兵先攻其南因焚其城門遂乘勝麾軍破其水砦月城是夜帝據月城樓親冒矢石率禁軍以攻其城丙午冬至分命諸軍急攻泗州是時太祖於城之西北隅構洞屋樹雲梯已傳其城矣一夕摧其城闔我師有登其陴取戰具而迴者城中大懼十二月乙卯泗州守將范再遇以其城降獲降卒三千餘人是日帝御泗州城樓受宰臣以下稱賀戊午帝聞有賊船數百泊於洞口先令輕騎偵之賊乃退保於清口是日平明領親騎發自

泗州繇淮之北岸太祖領兵繇淮之南岸夾淮齊進又命諸將率戰棹沿流而下己未至清口方舟以濟庚申追及淮賊是夜月色如練步騎數萬夾淮舟師沿流且戰且行金鼓之聲聞數十里辛酉至楚州西北帝乃駐馬指畫諸將一鼓而進破之賊衆數千猶陣於南岸太祖領數十騎馳進擊之即時大敗因逐至楚州北門斬獲甚衆是時有賊船數隻順流東下帝乃親率驍騎循淮以追之又命太祖領精騎前進行六十餘里太祖擒

其首領偽保太軍節度使濠泗楚海都應援使陳承昭以歸數其收獲戰船除燒盪外得三百餘隻降卒除殺溺水得七千餘人自是長淮之中南人之戰棹盡矣壬戌偽濠州團練使郭廷渭乙丑偽雄武軍使崔萬迪皆以城歸順丁丑泰州平是月江南李景遣兵驅虜揚州士庶渡江焚其州郭而去

五年正月丙戌右龍武將軍王漢璋奏攻下海州乙巳帝親攻楚州丙午拔之斬偽守將張彥卿等二月天長

軍使易贇以城歸順戊午帝南巡丁卯駐蹕於廣陵三月壬午朔幸泰州駐蹕於行宮丙戌瓜步鎮羗人押潤州軍將丘亮到行宮且言江南李景欲差使朝貢丁亥帝發自泰州復幸廣陵壬辰幸迎鑿江口命武衛大將軍李繼勳已下帥黑龍船三十隻於江中灘上殺吳寇數百人虜賊船二隻以歸癸巳帝復幸江口命太祖帥戰棹入江以逐賊船軍士乘勝因直抵南岸焚其營柵至暮而迴丙申江南國主李景遣其臣偽兵部侍郎陳

覺奉表來上仍進方物是日帝召覺對於帳殿凡數刻
覺奏云臣願自過江取本國表章進納廬舒蘄黃四州
之地乞畫江為界以事陛下哀告之詞悽然可憫帝曰
能如是朕復何求若吳主復能舉國內附則亦當待以
優禮固不阻他稱朕已亥李景遣其臣劉承遇奉表以
廬舒蘄黃四州來上且乞畫江為界江北平

六年三月丙寅御札曰朕猥以涼德紹此丕圖既為
乘之君宜去兆民之患雖晨興夕惕每嘗思於萬機而

紫塞黃河猶未親於經畧秋夏則波濤罔測三冬則邊鄙驚搔將期安國利人豈憚櫛風沐雨今取此月內駕幸滄州已來應沿路排頓竝以官物充餘依舊例以右羽林統軍李繼勳充棹船左廂都部署前澤州刺史劉洪副之以前虢州刺史劉漢遇充棹船右廂都部署客省副使劉贊原副之以宣徽南院使吳廷祚為權東京留守判開封府事宣徽北院使咎居潤副之以三司使張美為權大內都部署甲戌帝離京辛卯至滄州是日

晝漏未盡帝戎服乘馬率步騎數萬發自滄州直趨敵
界中夜駐蹕於野次壬辰至乾寧軍己未帝大治舟師
以備北伐丁酉御龍舟率內六軍鳴鼙鼓棹順流而北
艘船戰艦首尾數十里己亥至濁流口自北泝流以進
庚子雲旗徼西北而行又徼西南而行皆順河路也壬
寅以自關之西河路漸隘水不能勝舟有巨舫數千艘
不能進乃捨之其餘小舟即命步卒挽之以進是時帝
亦捨龍舟乘馬登陸按轡而西癸卯帝入于瓦橋關駐

踞於行宮太祖未及解鞍旋聞關西之北有敵騎數千
乃領百餘騎往擊之敵兵皆望塵而退五月乙巳朔侍
衛使李重進以下諸將相次帥師而至是日敵瀛州刺
史高彥暉上表歸順關南平是行也王師數萬不亡一
矢而契丹城邑皆迎刃而下

冊府元龜卷一百十八